

Protocol

Dalla 15. radunonza generala dil Provediment d'aua Medel/Lucmagn, gievgia ils 23 da mars 2023 allas 20.00 uras ell'aula dalla scoletta a Curaglia

Tractandas :

1. Beinvegni
2. Elecziun d'in dumbravusch
3. Approbaziun dil protocol dils 24-03-2023
4. Presentaziun ed approbaziun dil quen 2022
5. Rapport dil president
6. Program da lavur 2023
7. Damonda da credit
 - a) Provediment d'aua Fuorns
 - b) Sanaziun vias Curaglia
 - c) Program da pilotadi
8. Fixar las taxas d'aua per 2023
9. Elecziuns/ reelecziuns
 - a) president
 - b) cassier
 - c) 1 revisur da quen
10. Varia

Perstgisas: Gabriel Venzin, Claudio Pally

1. Beinvegni

Il president Alfons Venzin fa a tuts presents in cordial beinvegni alla 15avla radunonza generala dil Provediment d'aua Medel/Lucmagn. El menziunescha che l'invitaziun e la gliesta da tractandas ei vegnida publicada conform als statuts. Sin la damonda sche zatgi dils presents giavischi aunc ina midada ni amplificaziun dalla gliesta da tractandas ei negin s'annunziaus. Aschia declara il president la radunonza per aviarta.

2. Elecziun d'in dumbravusch

Sco dumbravusch vegn Manuel Giger proponius ed era elegius. Presents ensemen cun la suprastonza ein 16 vischins presents.

3. Approbaziun dil protocol dils 24-03-2022

Il protocol dalla 14avla radunonza generala dils 24-03-2022 ei publicaus sin nossa pagina d'internet. Pertuccond il davos protocol ha negin dils presents damondas. Aschia fa il president la tscharna d'approbar il protocol aschia sco el ei publicaus. Ils presents approbeschan il protocol unanimamein. Il president engrazia agl actuar per l'ediziun.

4. Presentaziun ed approbaziun dil quen 2022

Il cassier Pauli Pally pren il plaid e declara detagliadamein il quen digl onn 2022. Il quen annual digl onn 2022 muossa in total d'entras da 121'978.10 frs. ed in total d'expensas da 110'497.00 frs. Quei sedat in surpli dad entradas da 11'489.10 frs. La summa totala d'activas respectiv passivas munta 880'325.90 frs. Il Provediment d'aua posseda per ils 31-12-2022 in capital agen da 341'666.35 frs.

Il cassier declara ch'il Provediment d'aua seigi muort la summa d'entras suttamess alla taglia dapli valeta. El declara dils avantatgs resp. disavantatgs e la lavur che quella nova sfida porta.

Il quen annual dil Provediment d'aua per igl onn 2022 ei publicaus sin la pagina d'internet dalla vischnaunca Medel.

Il cassier dad il plaid als presents per damondas. Duri Lutz fa la damonda tgei che la posiziun 3805 sperdita sin taxas munta. La sperdita sin taxas ei la summa dallas taxas buca pagada dil Hotel Posta a Curaglia. Quella summa buca pagada vegin nus buca pli a retscheiver ord il motiv che nus possedin negina segirada sin pegn.

Pauli informescha ch'il preproject per igl aquaduct da Fuorns hagi custau 123'000.00 frs. Quels cuosts ein vegni surprandi cumpletamein dil cantun.

Il cassier engraziar als consuprastons ed era als revisurs per la buna collaboraziun enteifer siu temps sco cassier.

Il president dad il plaid ad in revisur. Hanspeter Bundi pren il plaid e declara ch'il quen ch'els hagian controllau seigi tut en uorden, declaraus miniziusamein

e tuts mussaments seigien avon maun. Hanspeter engrazia al Pauli per la buna lavur ch'el fa sco cassier per il Provediment d'aua.

El fa gest la tscharna d'approbar il quen sco el ei vegnius presentaus.

Quel vegn approbaus unanimamein dils presents.

5. Rapport dil president

Sco mintg'onn dat il president in cuort rapport dil schabegiau igl onn vargau.

El menziunescha che la responsabladad e las pretensiuns enviers il

Provediment d'aua creschien onn per onn ed aschia pretenda ei adina puspei remaduras ed investiziuns vid noss'infrastructura, per aschia corrispunder allas perscripziuns actualas.

Igl onn 2022 ha pretendiu bia lavur sin differents plazzals vid noss'infrastructura.

Las controllas dalla qualidad dall'aua ch'ei succedidas igl onn vargau, ina ga entras igl uffeci per la segirezzia da victualias e la sanadad d'animals ed ina ga entras il Provediment d'aua, seigen stadas tuttas da buna qualidad. Ils resultats leutier ein publicai sin la pagina d'internet da nossa vischnaunca.

A Curaglia ha la vischnaunca sanau la Via Principala. Cheu havein nus remplazzau la lingia da transport d'aua che sesanfla sut la via ed ils hidrants. Plinavon havein nus remplazzau la lingia d'aua en la Via sin Trutg tochen e cun il hidrant sur la casa da Gabriel Venzin. Ils sclusadurs e las lingias tier ils objects ein era vegni remplazzai. Quels cuosts vegnan surpris da mintga proprietari sez. Plinavon ei la lingia tiara da quellas casadas vegnida distaccadas dalla lingia d'aua.

Ils cuosts che tucan al Provediment d'aua vegnan subvenziunai dil cantun, confederaziun e segirada da baghetgs cun 50%. La vischnaunca ha medemamein empermess da surprendre 10%.

A Fuorns ei l'emprema etappa dalla sanaziun dalla via succedida. Cheu sesanfla neginas lingias dil Provediment d'aua sut la via. Sulettamein in bischel vit havein nus tschentau sut la via per traversar quella cun la lingia d'aua per il niev aquaduct.

Il preproject per il niev aquaduct da Fuorns ei vegnius elaboraus e presentaus als uffecis dil cantun e la confederaziun. Lez han era approbau quel. Ils 20 da decemer havein clamau ad ina radunonza extraordinaria per dumandar in credit per surdar la planisaziun digl aquaduct niev a Fuorns. Quei ei stau necessari per che saveien spluntar tier il cantun e confederaziun per sustegn finanziel avon che las lavurs vid la Via da Fuorns entscheivan. Ensemen

cun la secund'etappa dalla sanaziun dalla via remplazzein nus nossa lingia d'aua, la quala nus havein era integrau enteifer il project dil niev aquaduct.

Il 20 da fevrer 2023 essan stai obligai cun in scriver dad appelar la populaziun da spargnar aua. Suenter dus unviarns cun pauca neiv ed ina stad 2022 fetg schetga furnevan nossas fontaunas aschi pauc aua sco aunc mai. Il 20 da fevrer 2023 havein duvrau a Curaglia pli bia aua che las fontaunas da Plimata pudevan furnir. Sin nies scriver ei il diever d'aua sminuius considerablamein.

Era igl onn 2022 havein giu entginas ruttadiras vid nossa reit da lingias d'aua. Il 28 da mars ina ruttadira a Fuorns sper caplutta. Il 30 da fenadur in ruttadira a Pardé giun Quadras. Il 20 d'uost havein anflau ina ruttadira sut Dual. Cheu mava a piarder considerablamein aua. Demai che l'aua flessegiava naven entras la lingia da derschentiar la via ei quella ruttadira stada ditg nunveseivla. Plinavon ha ei dau differentas ruttadiras vid lingias privatas. A Platta sper la punt havein remplazzau dus sclusadurs. Era havein remplazzau in sclusadur a Curaglia.

Las seivs per proteger las zonas da schurmetg S1 a Puzetta e Tegia Nova ein vegnidas erregidas dallas alps pertuccadas.

La suprastanza ha tenu 6 sedutas. Ina ensemen cun ils surveglader d'aua, ina cun la suprastanza da vischnaunca ed ina cun il stab directiv communal.

Sco finiziun lessel engraziar a mes consuprastonts ed era al geru Corsin per la buna collaboraziun. Medemamein in grond engrazia fetg als survegladers d'aua per lur buna lavur.

6. Program da lavur 2023

Il program da lavur per igl onn 2023 ei emplenius pulitamein.

Quei ei inaga la proxima etappa dalla sanaziun dallas vias dil vitg da Curaglia entras la vischnaunca da Medel. Ei setracta uonn dallas vias Via Sumaval, Via Fravia e la Via Raveras. Dapli informaziuns sut damonda da credit.

Era vegn la Via da Fuorns sanada entras il cantun. Era cheu vegn nossa infrastruttura sanada.

La planisaziun dil project dil aquaduct da Fuorns ei vegnius surdaus alla firma Clarplan GmbH da Vella. Quella ha lu surdau vinavon quella lavur alla firma d'inschignier ipz da Mustér. Era cheu suondan ulteriuras informaziuns sut la tractanda damonda da credit.

El reservuar si Plaun da Muschins vegnan las duas uras per mesirar l'aua remplazzadas. Quellas uras che mesiran l'aua ch'entra el reservuar ein defectas ed ord funcziun.

Las seivs per las zonas da schurmetg S1 a Tegianova e Puzetta vegnan erregidas dallas alps pertuccadas. Cheu sauda ei a nus da controllar che quellas vegnan erregidas ad uras e porschan il schurmetg sufficient.

Sin la damonda dil president sch'ei dat aunc damondas ni amplificaziuns s'annunzia Duri cun la damonda cura che la fontauna donnegiada si Pass Nausch vegni sanada. Il president sincera a Duri che la suprastanza seigi cunsiens da quella fontauna denton momentan seigi il program da lavur ed era las expensas financialas dil Provediment d'aua surcargadas cun projects da pli auta prioritad.

Quella sanaziun vegni segir a succeder aschিপrest sco pusseivel.

7. Damonda da credit

a) Provediment d'aua Fuorns

Il president declara la situaziun digl aquaduct da Fuorns naven dalla bova dalla stad 2019 che ha destruiu las fontaunas ed il mir da protecziun si la Val la Buora. Las reparaturas urgentas fatgas immediat e las lavurs vid il mir d'ustanza ch'ei vegnidas refusadas digl uffeci d'ambiend muort la zona da protecziun Glatsher davos la Buora nr. 1405 da muntada naziunala . Il pareri pauc legreivel dil hydrogeolog e las controllas dalla qualidad dall' aua ch'ei adina puspei munglusas.

La suletta alternativa che havein anflau ei stau da tschaffar las fontaunas dalla Val Parada e retrer l'aua cun in niev aquaduct per il vitg dad Acla e Fuorns comunabla. Leutier havein surdau alla firma ipz la lavur per in preproject, il qual ei era vegnius approbaus e finanziaus dil cantun e dalla confederaziun. Suenter ina radunonza extraordinaria dils 20 da december 2022 che ha approbau il credit per la planisaziun, havein nus decidu da surdar las lavurs da planisaziun tier quei project alla firma Clarplan GmbH da Vella. Lez han incumbensau la firma ipz da Mustér per luvrar vinavon vid la planisaziun da quei project.

Il cantun e la confederaziun subvenziuneschan quei project cun 64% dils cuosts. La segirada da baghetgs Grischuna ha segirau la summa da 330'000.00 frs. La vischnaunca ha empermess ina contribuziun da 10% dils cuosts. Igl uffeci per natira ed ambient ha empermess da surprendre ils cuosts per renaturalisar igl aquaduct vegl. Aschia resta per il Provediment d'aua aunc ina part da 20% dils cuosts. Cheu essan nus denton aunc sin la tscherca dad instituziuns socialas che sustegnan nies project.

Igl entir project ei schazegiaus cun cuosts da 4'300'000.- frs.

Cun entgins maletgs declara il president ils puncts culminants da quei project che sesanfla momentan en la fasa da planisaziun detagliada.

Las lavurs per remplazzar la lingia da transport che va parallel cun la sanaziun dalla via dil vitg da Fuorns ein medemamein cumpridas en quei project. Cheu vegn la lingia da transport, las lingias tier ils hidrants ed ils hidrants remplazzai. In hidrant vegn allontanaus. Ils sclusadurs e las lingias tier ils objects ein caussa dils proprietaris.

Il vitg dad Acla duei sunter la realisaziun dil niev aquaduct, esser ina cumpart dil Provediment d'aua Medel.

Il president dat il plaid als presents per discussiun e damondas tier quei project. Werner Giger damonda co ei stat cun la qualidad dall'aua da Fuorns.

Igl onn 2022 ein las controllas d'aua stadas suffizientas. Igl onn 2021 havein giu en pliras spuras da bacterias. Il quantum d'aua che flessegia dallas fontaunas ei fetg dependenta dall'aura. Ei l'aura bletscha crescha il quantum da l'aua parallel cun l'aua dil Rhein da Fuorns. Quei ei aschia dapi la bova dalla stad 2021 che ha menau il letg dil Rhein en la vischinonza dallas fontaunas. Era ha la quantidad da glera e crappa en la stiva d'aua priu tier conciderablamein dapi lu. Aschia semida la qualidad d'aua cun la situaziun dall'aura.

Toni Venzin fa la damonda sch'il project riguarda era la producziun dad energia electrica regenerabla ?

En quei project eis ei previu da turbinar l'aua dalla fontauna Val Parada en il reservuar a Tscheps.

Constantin Venzin vul saver sch'el sco proprietari dil prau a Tscheps nua ch'il reservuar ei planisau vegni aunc informaus en caussa nua ch'il qual vegni la finala plazzaus.

Il president conferma ad el ch'igl inschignier vegni aunc a prender contact cun el en quella caussa.

Demai ch'il Provediment d'aua ei obligaus da prefinanziar ils cuosts compleins da quei project fa la suprastonza la damonda da credit per 4'300'000.- frs.

Quella damonda da credit ella summa da 4'300'000.- frs vegn approbada unanimamein. Il president engrazia als presents cordialmein per la fidonza demussada enviers la suprastonza.

b) Sanaziun vias Curaglia

Era uonn continuescha la vischnaunca cun la proxima etappa dalla sanazin dallas vias el vitg Curaglia. Questa stad ei planisau la sanaziun dallas vias Via Sumaval, Via Fravia e Via Raveras. Parallel tier quella sanaziun rempazzein nus la lingia da transport d'aua naven da giusut la casa dil Casper Bundi tochen giu tier la casa da Duri Lutz. Ensemen cun la lingia da transport d'aua ella Via Fravi sedat quei ina lingia da ring per segirar la disponibilitad dall'aua en quei

quartier. Vinavon vegnan remplazzai dus hidrants e dus begls. Il hidrant nr. 1 o Sumaval vegn allontanaus demai che quel fa buca basegns egl avegnir. Ils sclusadurs ed las lingias privatas tier ils objects han ils proprietaris da pagar. Demai ch'il Provediment d'aua ha era cheu da prefinanziar tut ils cuosts fagein nus la damonda da credit per la summa da 210'000.- frs. Ils cuosts per las lingias privatas en la summa da ca. 35'000.- frs vegnan silsuentar incassai entras il Provediment d'aua.

Il president dat il plaid als presents per menar la discussiun e far damondas en caussa. Duri Lutz fa la damonda tgi che surprandi ils cuosts per ils begls novs ? Ils begls novs ein posses dil Provediment d'aua. Il president sincera denton ch'el fetschi aunc la damonda alla vischnaunca per ina partizipaziun vid ils begls, demai ch'igl ei stau il giavisch dalla suprastanza communal ch'ils begls vegnan buca allontanai ord nies vitg.

Pia fa il president la damonda per il credit en la summa da 210'000.- frs.

Quei credit en la summa da 210'000.- frs. vegn approbaus unanimamein dils presents.

c) Program da pilotadi

Il program da pilotadi da nies aquaducts datescha dalla davosa sanaziun igl onn 2009. Sco usitau tier quels programs da IT vegnan quels suenter entgins onns buca adatai pli. Aschia essan nus sfurzai da remplazzar il program suenter haver rentardau quella midada gia entgins onns. Nus havein mercadau cun la firma Rittmeyer aschi bein sco pusseivel ed aunc cumpriu entginas lavurs necessarias en quella investiziun. Ils cuosts totals per in niev program da pilotadi, remplazzar tut las accus vid ils stabiliments ed aunc remplazzar las uras d'aua el reservuar a Plaun da Muschins muonta a 36'000.- frs. 40% da quella summa vegn surprida dalla vischnaunca demai ch'il pilotadi dallas seraneras ein ina part da quei program.

Il president dat il plaid als presents per far damondas. Neginas

Pia fa il president la damonda da credit en la summa da 36'000.- frs.

Quella damonda vegn approbada unanimamein d'als presents.

8. Fixar las taxas per 2023

La suprastanza fa la proposta da schar las taxas sco igl onn vargau. Avon dus onn ein quellas gia vegnidaz alzas.

Demai che negin giavischa il plaid fa il president la damonda per laschar las taxas sco igl onn vargau.

Quella proposta vegn sustenida unanimamein dils presents.

9. Elecziuns/ reelecziuns

Uonn vegnan il president, cassier ed in revisur da quen elegi. Il cassier Pauli ha demissiunau.

Il president dat il plaid agl actuar per eleger il president.

Igl actuar Otmar pren il plaid e declara ch'igl Alfons hagi buca demissiunau e stat aschia a disposiziun per la suandonta perioda d'uffeci. El fa denton tuttina aunc la damonda als presents per in'ulteriura proposta per il presidi. Cheu negin che porta propostas. Pia fa igl actuar la damonda per reeleger igl Alfons Venzin sco president dil Provediment d'aua per ils proxims treis onns.

Ils presents reelegian igl Alfons unanimamein.

Igl Otmar fa agl Alfons in cordial engraziament per siu grond engaschi e declara el per elegius sco president per ils proxims treis onns.

Igl cassier Pauli ha abdicau da siu post sco cassier. Il president ei staus alla tscherca d'in niev cassier ed ha anflau quel ella persuna da Cedric Flepp. El sa denton surprender sia incarica sco cassier per naven dil settemer 2023. Il Pauli ei denton sedeclaras prompts da menar vinavon il quen dil Provediment d'aua entochen ch'il Cedric surpren il post da cassier.

Il president fa als presents la damonda per autras propostas. Cheu negin che numna autras propostas.

Pia fa il president la damonda d'eleger Cedric Flepp sco niev cassier dil Provediment d'aua. Cedric vegn elegius unanimamein sco cassier.

Il President engrazia al Pauli per sia gronda lavur prestada ed era per sia promptadad da segidar tochen che Cedric surpren siu pensum.

Al Cedric engrazia igl Alfons per surprender quella nova incarica.

Era il revisur da quen Martin Bearth ei prompts per ina reelecziun per ils proxims treis onns. Damai che negin dils presents propona in'otra persuna per quei post fa il president la damonda per sia reelecziun. Quella ei unanima.

Il president engrazia era al Martin per siu engaschi en favur d'il Provediment d'aua.

Als presents engrazia igl Alfons per la fidonza demussada enviars la suprastonza.

10. Varia

Sut varia dat il president il plaid als presents per discussiun ni damondas. Cheu negin che giavischa il plaid.

Era la suprastonza fa neginas menziuns sut varia.

Il president envida tut ils presents dad aunc star in mument e far in sitg da cumpignia.

Cun quei invit siara il president la 15avla radunonza generalala, el engrazia a tuts presents per lur preschientscha e giavischa a tuts in bien retuorn a casa.

Curaglia, ils 31-03-2023

Igl actuar :

Otmar Venzin